



Reykjavík, 17. mars 2025

MSS24030028

## MINNISBLAÐ

**Viðtakandi:** Velferðarráð og skóla- og frístundaráð

**Sendandi:** Rannveig Einarsdóttir, sviðsstjóri velferðarsviðs og Steinn Jóhannsson, sviðsstjóri skóla- og frístundasviðs

### Efni: Skýrsla stýrihóps um biðlista

#### Forsaga

Þann 19. júní 2024 var samþykkt í velferðarráði breytingartillaga við tillögu Flokks fólksins, sem hafði verið lögð fram í borgarstjórn og vísað til velferðarráðs, um að setja á laggirnar stýrihóp til að rýna biðlista barna og ungmenna eftir skólaþjónustu. Breytingartillagan sem samþykkt var í velferðarráði var svohljóðandi:

*Velferðarráð samþykkir að stofna stýrihóp sem fengi m.a. þau verkefni að rýna biðlista barna og ungmenna eftir skólaþjónustu, í nánú samstarfi við starfsfólk, til að meta hvort framsetning listans og skráning erinda/tilvísana sé með þeim hætti að hann gefi raunsanna mynd af stöðu mála. Í því felst að skoða hvað mörg börn á biðlistanum hafa fengið þjónustu eða hluta af þjónustu. Einnig hvaða þjónustu var óskað eftir samkvæmt tilvísun/beiðni og meta hvaða breytingar þurfi að gera á fyrirkomulagi skólaþjónustunnar til að gera hana skilvirkari. Markmið hópsins er að stytta biðtíma barna eftir þjónustu. Stýrihópurinn leggi fram tillögur til úrbóta haustið 2024. Sviðsstjóra er falið að tilnefna starfsmann stýrihópsins og útbúa skipunarbréf sem lagt verði fram á fyrsta fundi. Eftirtaldir fulltrúar í velferðarráði sitja í stýrihópnum: Þorvaldur Daníelsson, Kolbrún Áslaugar Baldursdóttir og Ellen Calmon.*

Starfsmaður hópsins var skipaður Hákon Sigursteinsson, verkefnastjóri farsældar.

Þann 6. desember 2024 var skýrsla stýrihópsins kynnt í velferðarráði. Stýrihópurinn lagði til fjölmargar aðgerðir til að sporna við bið eftir þjónustu, þ.á.m. tillögur sem heyra undir ábyrgðarsvið skóla- og frístundasviðs. Þjónusta við börn og fjölskyldur er veitt á miðstöðvum Reykjavíkurborgar undir merkjum Betri borgar fyrir börn (BBB) og bera bæði velferðarsvið (VEL) og skóla- og frístundasvið (SFS) ábyrgð á mismunandi þáttum þjónustunnar (sálfræðingar heyra t.d. undir velferðarsvið en talmeinafræðingar og hegðunarráðgjafar undir SFS). Sökum þess að margar tillagnanna í skýrslu stýrihópsins vörðuðu þjónustu sem innt er af hendi undir formerkjum BBB á miðstöðvum var ákveðið að óska eftir umsögn skóla- og frístundaráðs áður en afstaða væri tekin til afgreiðslu skýrslunnar. Skóla- og frístundaráð veitti umsögn um skýrsluna á fundi sínum 16. janúar sl. og tók fram að þær tillögur sem kæmu fram í skýrslunni væru góðar og mikilvægar og að þær leiðir sem væru lagðar til væru ákjósanlegar. Talið var að styrkur hefði þó verið



Reykjavík



af því ef meira samráð hefði verið haft við starfsvettvang frístundastarfs sem og ef fengin hefði verið inn í hópinn þekking fá Miðju máls og læsis, sem er þekkingarteymi á vegum borgarinnar sem fer á vettvang og veitir kennurum og starfsfólki í skóla- og frístundastarfi stuðning, ráðgjöf og fræðslu varðandi málþroska, læsi, íslensku sem annað mál, fjölyngi og fjölmenningu.

Skýrslan hefur ekki enn verið afgreidd í velferðarráði en samhliða málsmeðferð skýrslunnar í velferðarráði gerðist það á fundi borgarstjórnar þann 4. mars sl., að lögð var fram aðgerðaáætlun nýs meirihluta, þar sem samþykkt var svohljóðandi tillaga, nr. 12 í áætluninni:

### ***Tillaga um skólaþjónustu***

*Lagt er til að borgarstjórn samþykki að fela skóla- og frístundaráði að gera tillögur um fjölgun sérfræðinga í skólakerfinu eins og talmeinafræðinga og sálfræðinga, greina hvar helst er þörf á slíkum stuðningi og gera kostnaðar- og tímasetta áætlun sem miðar að því að þjónusta verði í boði frá og með næsta skólaári.*

### ***Greinargerð***

*Byggt er á skýrslu stýrihóps um rýningu á biðlista barna og ungmenna eftir sálfræðiþjónustu miðstöðva og mat á framkvæmd þjónustunnar. Markmiðið er að stytta biðlista barna eftir skólaþjónustu og bregðast við sem fyrst með stuðningi við börn og foreldra.*

Í ofangreindri tillögu er skóla- og frístundaráði falið að gera tillögur um fjölgun sérfræðinga í skólakerfinu og vísað til áður nefndrar skýrslu stýrihópsins til grundvallar. Sökum þess að nefnd tillaga er ein af þeim tillögum sem stýrihópurinn lagði fram í áður nefndri skýrslu og krefst aðkomu bæði velferðarsviðs og skóla- og frístundasviðs, er lagt til að stofnaður verði sameiginlegur starfshópur beggja sviða sem mun hafa það verkefni að afgreiða tillöguna, sem og að kostnaðarmeta aðrar þær tillögur sem koma fram í skýrslu stýrihópsins, meta áhrif þeirra og gera grein fyrir niðurstöðum í báðum ráðum. Hópurinn skili niðurstöðum fyrir 15. júní 2025.

Í starfshópnum eigi sæti af hálfu velferðarsviðs, skrifstofustjóri skrifstofu ráðgjafar, sem fer með málefni barna og fjölskyldna, framkvæmdastjóri einnar miðstöðvar, deildarstjóri í deild barna og fjölskyldna á einni miðstöð. Af hálfu skóla- og frístundasviðs í starfshópnum eigi sæti skrifstofustjóri miðlægrar skrifstofu, einn fagstjóri leikskóla, einn fagstjóri grunnskóla og einn framkvæmdastjóri frístundamiðstöðvar á miðstöðvum borgarinnar sem og fulltrúi frá miðju máls og læsis. Auk þess verði í hópnum verkefnisstjóri farsældar.

